

Fida Nyamesemka: Esusuowketseaba 24, 2013.
(Friday sermon – 24th May, 2013 – Fante Translation)

KHILAFAT-E-AHMADIYYA

Ber a Ɔkrantsee tashahud, tawwudh na Surah Al Fatiha wiee no, Hadhrat Khalifatul Masih V (Nyankopon mfa Ne mboa Kese no nhye no dzen) kenkaan Kuran Kronkron tsir eduonum esoun Surah Al Nur nyiyimu eduonum ebien (52) kepem eduonum esoun (57).

Allah Ɔsorsornyi No ka de: “Agyedzifo no, se wofre hon ko Allah na No Somafo no ho de mbre obeye ma woebu hon ntamu atsen a, asem a woka ara nye de ‘Yeatse na yeaye setsie’. Na woyinom na wobonya eyiedzi

“Na obiara a oye setsie ma Allah onye Ne Somafo no, na osuro Allah no, na ofa No de oye N’akokyem a Ɔbo no ho ban no, woyinom na wobeye nkunyimdzifo no”

“Na wodze Allah dzi nsew ka hon ntam a no mu ye dzen papaapa de, se woma hon ahyedze a, ampaara de woboko hon enyim. Ka de, Mma hom nndzi nsew biara,; dza ohia ara nye setsie ankasa wo dza otsen ho. Ampaara de Allah nyim dza hom ye nyinara”

“Ka de: Hom nye setsie mma Allah na hom nye setsie mma Somafo no. Mbom se hom dan hom ho ko a, ono n’adzesoadze beda hom do, na w’adzesoadze beda woara wo do. Na se hom ye setsie ma no a, hom benya kwankyerɛ pa no. Na asodzi biara nnda Somafo no do gyede Asomasem no ne ka obeda edzi no nko”

“Nyankopon ahye hon a woka hom ho a wogyɛ dzi na wodzi dwumapa de Obeye hon Adzedzifo wo asaase yi do de mbre Oyeɛ hon Adzedzifo fiir nkorɔfo a wodzii hon enyim kan no, na ampaara Obema hon som no a Ɔasa mu eyi esi ho no etsintsim ama hon na afei so oye dzen denara a, Obesesa ama hon bambɔ na asomdwee wo hon suro ekyir. Wobosom Me, na wonnkɛfa biribiara abata Mo ho. Na afei obiara a obeye otsiafo dem ekyir no woyinom na woye etuatsewfo no”

“Na hom nye asɔr na hom ntua ntoboa (Zakat) na hom nye setsie mma Somafo no, ama woeehu hom mbɔbɔr”

Da soronko bi wo ho ma Ahmadiyya Kuw mba a osi wo Ebowbira bosom mu. Mekyerɛ Ebowbira ne da a ɔtɔdo eduonu esoun (27th May) a wato no dzin Khilafat Da na Kuw yi kaa dem da yi; modɔ mepɛ de me kasapɔw gyina iyi do ndɛ. Dembre Ebowbira ne da a ɔtɔdo eduonu esia ye akomamu aseda da ma Ahmadiyya Muslim Mba yi na ɔwosoow dodowara hon gyedzi yi na ɔmaa gyegyeeɛgye baa binom hon akoma mu yi, Ahmadiyyafo hon atanfo dze oyeɛ da a wodze honamyaw, nkokohweasee na amandzehun bɔtoo kuwmba no do.

Ahmadiyya abakɔsem kyere hen ayeyɛdze na dwuma a atanfo dze edzi hen a woakyerɛw a se ekenkan a bobor bobow wo, de nyimpa dasanyi botum aye mberew ara a ma aba no de ber a Anohoba Mesia (ANN) nyaa ne beebi koree, otuu sa a ɔtse dem wo

Ahmadiyya Kuw yi do. Ɔye den ye ma dem dwumadzi yi a Ɔye awerehow yi hen enyi beda de nkorɔfo a wɔtow kɔ Nkɔmhyenyi Krɔnkrɔn (NNN) do de Ɔye ehumbɔbɔr ma wiadze nyinara yi botum aye dem.

Nkorɔfo nam hɔn tsebea do dzi dwuma na mbom Ɔye Ebowbira 27, 1908, yehun Allah Ne mbra kese a ɔdaa noho edzi eso yehun N'anohoba a Ɔbɔ2 no de Ɔrehye no mǎ. Dem da yi, Ebowbira 27, 1908 bae de wɔrobɔ asomdwee na bambɔ ho nsem dawur a ɔfa no Ahmadiyya Kuw ho. Dem da yi dze nsem dew a ɔhyee Nyankopɔn Ne bɔhye a Ɔnye Anohoba Mesia (ANN) no hyee no mǎ na ɔhyeew Ahmadiyyafo hɔn atamfo hɔn ebufuw na hɔn enyiwuii, na ɔbae so de da a otutuu hɔn akɔhwi enyigye na dɛwdzi.

Ebowbira 27 nnye da ara kwa mma Ahmadiyya Kuw no. da yi ye da a ohia papaapa na ne hia a ohia kɔ do ye kese se yehwe nkɔmhye a Nkɔmhyenyi Krɔnkrɔn Muhammad (NNN) hyee no a. Muslimfo dodowara a wɔwɔ wiadze dze nnuho na ayewdzi to hɔn enyi hwe Ahmadiyyafo, nokwar ɔwɔ de yeka de wɔdze ebufuw na ɔtan kese vhwɛ hen de yeatsintsim Khilafat Adzedzi no wɔ hen mu.

Wɔabɔ mbɔdzen mpɛn pii de wobetsintsim Khilafat Adzedzi no wɔ hɔn mu naaso onnsi kwaa n'asekyere kese nye de wɔannye setsie amma Nkɔmhyenyi Krɔnkrɔn Muhammad (NNN) n'akwankyerɛ no a no mu da hɔ kann no. Nkɔmhyenyi Krɔnkrɔn Muhammad (NNN) aka de, se Anohoba Mesia na Imam Mahdi ba a, wɔmfa yaw na amandzehu mu mbɔdzenmbɔ biara a ɔfata wɔnkɔ ne nkyɛn, wɔ ber a wɔrowea hɔn nan korma do wɔ esukwankyeaba bo do (glaciers of ice) se ohia de ɔba no dem a, na wɔmfa me nkyia, asomdwee nkyia mma no.

Afei Nkɔmhyenyi Krɔnkrɔn (NNN) kaa kyere obiara so de se wohu nsenkyeredze no de wɔrehye ma a onyia no a ɔde ɔtse dem no ye nokwafo. Nsenkyeredze no a Nkɔmhyenyi Krɔnkrɔn (NNN) bobɔ edzin no twa fa sor na asaase ho. Yetaa bobɔ edzin wɔ hɔn mboano mu eso yedze to hɔn a wotsia hen no hɔn enyim~ mbom ber yi dze ɔrennka ho hwee. Mbom Ɔye mbusu kesenara ma hɔn a wɔnngye nndzi de ɔnam wiadze na ahonya, anaa Muslim sunsum tumdzifo na nwomahufɔ no ntsi anaa de wɔmmfa hɔn adwen nnkɔ do anaa wɔmmbu Nkɔmhyenyi Krɔnkrɔn (NNN) n'akwankyerɛ no ntsi, nnye de wɔnngyee nyia no a ɔdze too no do de Ɔye Anohoba Mesia na Imam Mahdi nko bi, mbom hɔn aban afa tum abɔ hɔn bo de wɔka kasafi to ɔhotseweefo yi a Nyankopɔn asoma no yi do.

Nokwar nye de, hɔn ndzeyee yi ye bɔn. Na iyi nyinara, yedze de wonyim no mapa de ber yi a yewɔ mu yi dze nkekamu robɔ no dawur ma hɔn a wɔpe de wotsie de dem mber nye mber a nyia no a ɔwɔ de ɔba no, yi n'enyim. Nyankopɔn akyere nsenkyeredze nyinara a ɔfua iynom ekyir na Ɔkɔdo da nsenkyeredze edzi, mbom nkorɔfo yi gyina hɔn ananasa do tsia nyia Nyankopɔn asoma no yi. Dwumadzi biara a Ahmadiyyafo hɔn atanfo dzi tsia hɔn no Allah dze mpɔnse fofor ba hɔn do. Mbom hɔn tsimtsim na ntsen tum ye dzen ara ma wɔmmpɛ de wɔbegyae de wɔbɔko etsia hen. Dem ntsi se iyi nnye hɔn mbusu kese a nna Ɔye ebenadze na ebenadze na yebotum aka de Ɔye?

Kwan biara do no, me kaa de dem da yi hia papaapa na Nkɔmhyenyi Krɔnkrɔn (NNN) noara akasa afa ho wɔ no nkɔmhye no, no mu kor mu. Ber pɔkyee no dze ɔannka, mbom

nokwar mu, de odze too gua de obi reba a obeye nyia okron na oye no dofo nokwarfo sen obiara na ono na obeba de Anohoba Mesia no na ono n'ekyir no okaa de Khalifafo (Edziadzefo) behye ase, ohyee nkom wo dem da yi ne mbaa ho. Dem dza nna ebenadze na oye ehiadze papa sen de Nkomhyenyi Kronkron noara dze asem bi boto gua.

Nkomhyenyi n'enumkasa bi a Hadhrat Huriara (Nyankopon N'enyi ngye no ho) kaa de Nyankopon No somafo no kaa de: "Akomyefo dwumadzi nye hom betsen akepem ber a Allah pe. afei Obeyi efi ho na Adzedzi (Khilafat) a onam Akomyefo dzwumadzi do behye ase, na afei ber a Allah pe no Obeyi dem ayemuyiedze yi so. Afei onam Ne Kasanhye do ahendzi bon bosoer a obema nkorofu edzi awerehow na wabom, na se dem ber yi ba ewie a, de mbre Nyankopon Ne Kasanhye ber so tse no tumkaber (despotic) ahendzi bosoer kepem ber a Nyankopon N'ehumbobor bodwir dze dem etsiodzen na ndzebun aba ewie. Afei bio, Khilafat a onam Akomyefo dwumadzi do betsim" na okaa wie no Nkomhyenyi Kronkron yee komm.

Nkomhyenyi Kronkron (NNN) n'enumkasa yi enyi da ho kann, odzi kan Nkomhyenyi Kronkron (NNN) kasa fa Akomyefo dwumadzi ho na okasa fa Adzedzi ntoatodo (Khilafat-e-Rashida) wowo kwankyere papa no a woboko do wo Akomyefo dwumadzi no kwan do no, na wiadze hunii dzii ho dase, mbre Adzedzifo baanan no a wodzii kan no a wotaa fre hon Khilafat-e-Rashida no wotwee honho fii wiadze ahendzi na hon akasedze na enyimnyam ho. Wodze botae kortsee dzii dwuma, de wobedzi dwuma a Allah pe na wodze dem botae yi sii enyiwa do dze dzii dwuma de woye Adzedzifo. Afei so, wiadzemba hun mbre hon kasaa biara a Nkomhyenyi Kronkron (NNN) aka no baa mu ber a okaa de mber beba a ahendzi boko do na mber bi so n'ano bebre adze kakra na mber bi so n'ano beye dzen wo dza wodze ye nkorofu do.

Dem ntsi yekenkan abakosem a yehu de Nkomhyenyi Kronkron (NNN) n'anomu nsem hye ma wo de Khilafat-e-Rashida betsimii na ahendzi so a ne fabi ye dzen no yehun ayeyedze na ndzeyee bon a abordo. Ahenfo no a wobae no nna woboto ako wiadze na ndzemba pii do sen de woboto ako nyamesom do. Afei Nkomhyenyi Kronkron (NNN) kaa de, de mbre osi daapem no, Nyankopon hu N'abodze mbobor, na mber pii a woko sum mu no, Nyankopon N'ehumbobor no dwir na Odze ayeyedze na ndzeyee bon no ba ewie. Na Khilafat a onam Akomyefo dwumadzi mu no wodze bobo adze bio. Na afei otaa tsinkomm de mbre w'aka no wo Hadith no mu no.

Obiara botum dze dem Hadith yi ako adwendwen mu na obohu de Nkomhyenyi Kronkron (NNN) nkomye a ofa no Khilafat-e-Rashida obaa mu, afei so ne nsem a okyere de ahendzi beba a no tumdzi ano bebre adze kakra, na afei ahendzi so a no tumdzi ano beye hyew no, ne nyinara aba mu. Se otse dem a obeye den beye de nyimpa n'adwen mu beye no konsee wo Nkomhyenyi Kronkron (NNN) ne nkomye ne fa a odze ko ewie no? dem ntsi ber a nsenkyeredze nyinara ahye ma na Nyankopon so aka no wo Kuran Kronkron mu de: "Onye nkorofu fofor bi a wofi hon mu a wonnyaa nye hon nnka mboo mu. Na Ono nye Otumfo Nyansafo No" [\(62:4\)](#)

Se yeredan no aka asem kor no ara a, yebeka de Allah behyehye ndzemba a obema Khalifa a onam akomhyefo dwumadzi kwan do beba. Allah Osorsornyi no ka de: “Oye Otumfo, Nyansafo no”. Dem ntsi se Allah Tum, Ono a Ne Nyansa twa adze nyinara mu no, sii no gyina, na N’ehumbobor tuu ntsen no, Muslimfo no wogyee hon fii ahenfo ayekayekafo no nsa mu na Khilafat a onam akomhyefo dwumadzi kwan do Odze bobo adze de mbre Noara Ope no. Dem ntsi hen Ahmadiyyafo, hen tsir aye yie papaapa osiande yedzi dase de Nkomhyenyi Ne nkomhye ne fa a odzi kan no oye nokwar na yewo gyedzi wo mu, na yeehu de ahye ma na yeye nkorofu no a yegye nkomhye ne fa no a odzi ewie no dzi. Yegye dzi mapa de nkomhye no ne fa no a otse dem no so aba mu.

Nkomhyenyi Kronkron (NNN) ne Hadith bi so wo ho a otwa fa nsentsia bi a owo Sura Juma’ah mu. “Hon nye nkorofu fofor bi a wofi hon mu a wonnyaa nye hon nkaa mmboo mu. Na Ono nye Otumfo, Nyansafo no”. Se yehwe Allah Ne nsem yi a, na yehwe wiadze yi ne tsebea mu a, na yehwe nsenkyeredze yi a aba mu ti a, yeagye hen aber do Imam yi edzi, ono a wode obeba no. nkomhyenyi Kronkron (NNN) ne kasae bi mu no, odze mann Anohoba Mesia (ANN) no free no “nabeeullah”, anaade Osomafo na Nyankopon Ne Nkomhyenyi. Afei Nkomhyenyi Kronkron (NNN) no aka bio de emi na Anohoba Mesia (ANN) hen ntamu no Nkomhyenyi biara nnyi mu. Afei se yehwe nyiyimu anan no a owo Sura Juma’ah a, “wa aakhareena minhum”, Nkomhyenyi Kronkron (NNN) no kaa de onyia no a wobeyi no ber bi a oreba no beye de mbre onoara so sii baa wiadze.

Se yereka no bio a, nyimpa no a nkye owo de oba no a oye Anohoba Mesia (ANN) no dze odo a onnyi kabaa bodo Nkomhyenyi Kronkron (NNN), na obeye de no sunsum na obenya abodzin a odze Nkomhyenyi, se oba wiadze yi mu a. Ber a orekyere dem nyiyimu a owo Sura Juma’ah mu no, nna Nkomhyenyi Kronkron (NNN) dze ne nsa ato Hadhrat Salman Farsi n’abatsir na okaa de nyia a obeba wo nda a owo ekyir no, obefi dom no mu na onkweye Arabnyi.

Nkomhyenyi Kronkron (NNN) kaa asenkyeredze no a ofa no gyedzi ne nyewee a wotwe ko sor noho noho. Iyi ye asenkyeredze ma mber a dem Ulema, Muslim asofo na nwomahufu wogyee to mu na wopem do de aber a Anohoba Mesia (ANN) no daa no ho edzi no, nna Muslimfo hon gyedzi nndzi mu koraa; oye de gyedzi ayew nwionwion efi wiadze. Dem ntsi hon nyinara hu de nsenkyeredze nyinara aba mu. Na onam de nsenkyeredze nyinara aba mu ntsi oka kyere hen de Anohoba Mesia (ANN) no a owo de oba no, ampaara oba wo mber nara mu. Hwe, ma menkyere mu pefee de, onam de Anohoba Mesia (ANN) oye Khatamul Khulafa ntsi, wakron no ekodu Khalifa sor sor gyinabew mu a onam Akomhyefo dwumaddzi kwan do anaade yebotum aka de wodze Khalifa sor sor gyinabew no a onam Akomhyefo dwumadzi kwan do no ato no do.

Onam de waye no Anohoba Mesia a ahye Nkomhyenyi Kronkron (NNN) n’asem no ma, na no do no a owo Nkomhyenyi Kronkron (NNN) ho so no ntsi, wodze Akomhyefo sunsum ama no. dem ntsi Khalifa nhyehye a wodze Anohoba Mesia hyee ase ye ampaara de oye Nkomhyenyi ne dwumadzi kwan no. Na dwuma a owo de Khalifa dzi nye de obohwe de Muslim Umma dzi Kuran Kronkron no mu mbransem no do, na perperye na dwumadzi a oko

ma Allah na N’abodze no hye ma, na Muslimfo dzi dem dwuma no. na yefa no ntɔyɛ kwan do de ɔyɛ hen fasusu na yehwe de yedzi do na kuwmba nyinara yehye hɔn kɔn mu dzen ma wɔyɛ. Dem ntsi Khilafat-e-Ahmadiyya ye Khilafat-e-Rashida no nsɔwdo wɔ ekyir ber yi mu a yerekenyan Islam yi.

Ɔfa no Islam ne mber a odzi kan no, Nkomhyenyi Krɔnkrɔn tsee fii Allah hɔ ma ɔdze too gua de Khilafat-e-Rashida beba ewie wɔ mber bi mu. Mbom ɔfa no Khilafat a wobehye ase wɔ Islam ne nsakyeree wɔ mber a odzi ekyir mu no, ɔdze asempa a ofi Nyankopɔn hɔ yi too gua de Khilafat betsena hɔ afeboɔ. Na wo nanom na wɔdze asempa yi maa hɔn? Nokwar kotoo dem asempa yi wɔdze mae na ɔbeyɛ nokwar ama hɔn a wobedzi Khilafat nhyehyɛ do no. Hɔn a wobenantsew nyamesuro na tseneneeye akwan mu na wɔaye ndzeyɛpa na woboko do ara ama hɔn asɔryɛ edzi mu.

Nkorɔfo pii wɔ hɔ a wobodom Ahmadiyya Kuw yi, mbom ɔnam de wɔnnye hɔn ahyɛdze mma Khilafat-e-Ahmadiyya ntsi Allah Ne Nhyesem ma wɔtsew hɔnho fi Jama’at-e-Ahmadiyya mu. Ana dem nkorɔfo yi a wɔtsew hɔnho fi Jama’at yi mu yi ma hen mpuntu mu kankɔ tɔ nsu mu anaa? Dabida! Se nyimpa a ɔtse dem kor fi mu a Nyankopɔn dze dom hye ananmu. Se wotwitwa dua ne mbayewa no a ewuwu anaade wɔsusow do a, ne nsunsuando nye de nhataa ebunibun na mbayewa a ahoozen wɔ mu fefew piinara. Ɔnam de ɔyɛ Nyankopɔn Noara N’anohoba de Khilafat ne nyɛɛ wɔde ɔkodo ntsi, Nyankopɔn Noara agye ato No do de Ɔbɔsusuaw na Ɔadow ho. Ɔnnkeba no de Nyankopɔn, Ɔsorsornyi no nnkɔhwe ma nkomhye a nyia Ɔdo No mapa na ɔda N’akoma ho papaapa hyɛ no ɔba mu. Nokwar mu nokwar, dem nkomhye yi aba mu na ɔbokodo ara ahyɛ ma.

Ampa, ɔyɛ nokwar de dem ahohiahia ber yi tum ba ber a hɔn a hɔn gyedzi ye mberew na hɔn a wotsia Ahmadiyya hye ase dwen de afei Ahmadiyya roboko n’ewie mbom Allah Ne nsenkyeredze wɔ mboa ho ba a Ɔgye Jama’at yi fi ahokyer mu. Awerɛhowsem a ne saso nnsii Jama’at yi mu nye, nokwar nye yi, ber a Anohoba Mesia (ANN) nyaa ne beebi koree. Atanfo no hɔn enyi gyee na Kuwmba no hɔn akoma tuu dodow, mbom nna Anohoba Mesia (ANN) no roboaboa dom no ho wɔ mber pii de ɔkaa kyeree hɔn a Allah aka akyerɛ no mpen pii dadaw de no wu ber aben. Mbom wɔaka de onnyi de ɔhaw hɔn anaa wonya abagow. Anohoba Mesia (ANN) no kyereew iyi wɔ no buukuu a ɔtoo ne dzin “The Will” (Ɔdabaa). Na ber a ɔkyereew dem no, de ɔnnkekyer na oefi wiadze yi mu no, ɔkyereew dza wobeyɛ wɔ sunsum mu, sikasem mu na mbre wobototo ndzɛmba na osii no tadua de Kuw no, nokwar mu, betsim na ɔakodo afeboɔ.

Ɔkaa kyeree Kuwmba no de mma ɔnnhaw hɔn mu biara osiande Allah ahyɛ no bo de Ɔbema Kuw no aye prɔmprɔm, osiande iyi nye Kuw no a Nkomhyenyi Krɔnkrɔn (NNN) ɔkaa nsempa wɔ ho de ɔbeyɛ nkɔso no, eso Khilafat besan etsim bio wɔ mber a ɔreba mu no. Anohoba Mesia (ANN) kyereew de: “Nyankopɔn N’asem ka kyere me de atonyankyem pii besi na ɔhaw kɛse bodwir wiadze do, binom besi wɔ monkwa da mu na binom so wɔ mowu ekyir. Na Ɔboma Jama’at yi do na Ɔama ɔetu anamon pi. Ne fabi besi wɔ m’aber do, na binom so m’ekyir a”.

Okodo ka de: “Na OdaTum asorotow ebien edzi. Odzi kan no, okyere no Tum Nsa no wo N’akomhyefo honara hon do. Otodo ebien, se Nkomhyenyi wu a, dza oye dzen na nsemansema ma hon mu do na otamfo no nya ahodzen na odwen de ndzamba aye bisibisi basaa na otse ase pi de afei Jama’at yi botso nsu mu na Kuwmba nyinara so ato pitsi na hon ekyir biew no ebubu, na binom a wonnyi egyinanan no fa kwan dze hon ko abrodotwa mu, iyi na oma dza otodo ebien no. Nyankopon kyere No Tum Kese na Ohye Kuw no a ohihim yi tsipia, wowaw hon na Ohwe hon do”.

Okodo ka bio de: “Oye ehiadze papaapa ma hom de hom bohu Nsenkyeredze a otodo ebien no so, na ne Mbae dzi mu ma hom osiande oye afebwo a bokodo ekodu Atsembua Da no. Na Asenkyeredze a otodo ebien nnkotum aba gyede moko ana. Na se moko a, Nyankopon dze Nsenkyeredze a otodo ebien bebra hom a onye hom betsena de mbre Nyankopon ahye ho bo wo Brahin-e-Ahmadiyya mu no. Na dem bohye yi nko mma emi. Mbom dem bohye yi ko ma hom de Nyankopon (rekasa kyere me) se: “Mebema dem Kuw yi a woye w’akadofa yi aka kuw nkaa no ahye akepem Atsembua Da”.

Dem no, onam Allah, Osorsornyi No N’adom ntsi, mfe oha nye enum ntamu yi yerehu Allah No bohye a ohye ma. Jama’at no kor ahokyer asorotow mu, na onam Allah N’adom ntsi Jama’at no gu do dze ahochar roko enyim wo nkunymdzi na yieye mu. Se atanfo no per de woye Jama’at no ayeyedze na ewurkadze wo oman kor mu a, Nyankopon ko tsia iyi ma akwan nwanwa pueipuei wo oman fofor mu na mbre obeye ma kanko ako do. Nnye iyi nko, oman a ahokyer aba mu ama hen no, ho so, Nyankopon ko do to Kuwmba no hon gyedzi mu. Na se muhu iyi wo me bra mu a, medze me mberewye to nkyen a, mbre Allah Osorsornyi No ma Kuwmba no kodo ko hon enyim wo kunymdzi na yieye mu, hon gyedzi nyin wo Allah mu dodow na hon gyedzi wo No bohye mu kodo wo mudzi mapa mu.

Ampaara, Allah Ne nsa a wommfa enyiwa nnhu kodo pia Jama’at no ko kan mpemdo mpemdo. Na obiara a Allah beyeno Khalifa no, se yeyi tsebea biara a onyia no wo mu to nkyen mpo a, Okodo ko no Mboa na Tsipia, Insha Allahu! (oye Nyankopon Ne pe a). Na Allah kyere dza owo de oye na nsenkyeredze woyii odziadzenyi a otodo enum wo Anohoba Mesia (ANN) ekyir no, na oada edzi pefee maa obiara de Nkomhyenyi Kronkron (NNN) no nkomhye na asem asomafo nokwarfo a oetu noho ama a oye Anohoba Mesia (ANN) kaa no, ye Nyankopon Ne Nhyesem de Khalifa a owo Nsenkyeredze a otodo ebien wo Islam mu wo mber a aka ekyir yi mu yi betsena ho afebwo. Na dem Nhyehyee yi bokodo edzi dwuma wo ekyir yi so. Se oye Nyankopon Ne pe a (Insha Allahu).

Mbom owo de yedze to hen adwen do de Allah akyere ndzeyee a hon a wobonya Khilafat mu ndzinoa no. Allah asensan dem ndzamba yi wo Kuran Kronkron ne nyiyimu a me kenkanee no na oye ehiadze ma hon a wope de wonya Khilafat mu ndzinoa de wobedzi do. Allah Osorsornyi No ka de: “Agyedzifo no, se wofre hon ko Allah na No Somafo no ho de mbre obeye ma woebu hon ntamu atsen a, asem a woka ara nye de “Yeatse na yeaye setsie”. Nyankopon ka de: “woyinom nye nkorofa a wobedzi nkunym”. Dem ntsi, yehu de kasa no nngyina som mapa ho nye nyamesom n’amandze nyee ho nko. Mbom, de mbre Kuran Kronkron ka no, kwan kor do okyere mu yie; dwumadzi na asodzi a nyimpa wo ma

Nyankopon, dem ara so na okyere mu yie dwumadzi na asodzi a nyimpa wo ma Nyankopon N'abodze.

Dem ntsi ha so, woabo nkorofu a wodze hon nsem ko asemdzibea wo aber a yewo nhyehyee wo Jama'at yi mu a wo bo mbodzen biara de wobesiesie wontwewontwe biara a o besi ekuw ebien ntamu wo aber a "Sharia" a oye Nyankopon Ne nhyehyee a oye ebusuakuw nye awarfo (mekyere kun na yer) ntamu. Se asem bi si a o ma yehu hon a adwen hon ba hon tsirmu na ahyese no wopow de wobedzi kan bodua Jama'at nhyehyee do aye nsiesie na mbom wotwe nsem no ko oman asemdzibea. Na se woenndzi anaa woennya dza worohwehwe a, na wosan hon ekyir ba Jama'at ne nhyehyee do. Iyi na okyere nyimpa no gyedzi na ne mberewye. Nyankopon aka de momin (gyedzinyi) nye nyia a ogyina Nyankopon na Ne Somafo nsem do ye nsiesie. Na Jama'at nhyehyee bo mbodzen biara na owo de wo bo mbodzen de, wobema hon atsenbu biara begyina Allah na Ne Nkomyhenyi mbransem do.

Me pe de mobu asoramba a se wodze asem bra hon a wonnya ber nhwehwe asem no mu nnko kan yie na wonntum nngyina Nyankopon na No Somafo mbransem do mmbu atsen. dem nkorofu yi ye hon na wonam do pam nkorofu fi Jama'at nhyehyee nye Khilafat nkyen. Nyankopon ahye Khilafat de onsiesie wontwewontwe wo perper kwan do. Siesie Jama'at no enyi ara ma aba no de Khalifa no nnkotum ako beebiara akodzi asem. na de mbre Jama'at no gu do rinyin no, dem ahokyer yi boko do ara aba. Dem ntsi, edzibewdzifo a wodze dem dwumadzi yi ahye hon nsa de wonsiesie nsemansema no, se wommfa nyamesuro na tseneneeye annye edwuma a, ono wodze Khilafat n'enyim botwitwuu famu na wobeye adzebonyefo wo Nyankopon enyim na woye Khalifafo adzebonyefo.

Dem ntsi metu "Qazis" (Atsenbuafu), dzibewdzifo na Ameerfo de womfa perperye mbua asem ama woetum ahye Khilafat nhyehyee no dzen. Na owo de wo bo hon ho mbodzen biara, aanye dem a ono woyinom ma woye dzibewdzifo naaso wobema Khilafat nhyehyee no ato pan. Nyankopon aka de, nkorofu a woye nkunyimdzifo nye hon a wo bo mbodzen de wobeye dza owo de woye nyinara wo Nyame ntsi na wodzi Jama'at ne nhyehyee do de mbre ofata. Bio, m'aka akyere hon a wodzi asem nyinara a wonnye Ameerfo nye Qazis de womfa Allah na No Somafo hon nkyerekyere nye edwuma. Mma hon nnye biribiara a o botwe hon efi perperye ho, anaa onkaye nyamesuro na tsenenee kwan ho. Hom mbo mbodzen de beye Khalifa n'ananmusifo. Se hom annye dem a, se menyid de asaase yi do ha ara mpo yebotwe w'aso no, oye adze a obotum esi. Iyi n'ekyir no Nyankopon Ne mponse so wo ho ma hon. iyi ye asem bi a oye hu yie a owo de banodzifo biara dwen ho yie.

De obi ye banodzifo no nnye de begye gynabew no ato wo do keke, owo de ehye no ho asodzi nyinara ma. Allah aka de, se eka de eye gyedzinyi anaa egye No Somafo dzi a nna egye to mu de agye Anohoba Mesia (ANN) no edzi a, na abo anohoba de bema wo gyedzi ehia akyen wiadze dwumadzi ahorow nyinara a, ono owo de edzi Allah na Ne Somafo no hon mbransem do. Dze biara a mber yi do odzikanyi beka akyere wo no owo de idzi do na owo de edzi ahyedze a Khalifa a otse egua mu no dze ahye wo nyinara do. Se hom annye dem a, hom bohye de yebeye dem, yebeye dem nyinara beye kwa. Nyankopon nyim hom akoma mu yie

na Onyim dza hom ka na dza hom ye nyinara yie. Wo nhyiamu ber biara, yehyia bo anohoba ka de asempa biara a Khalifa beka akyere hen biara yebedzi do, naaso nsem nketsenketse pii wo ho a yenntum nndzi do. Bio Kuran no mu mbranssem nketsenketse bi wo ho a yenntum nndzi do na yennyee dza ofata de yeeye.

Se merema mfatoho a, nhyiamu a yeaye no wo Atoee Mpoano (West Coast) ewie, yi hom nhwe mbasiafo no m'aka akyere hon de wonhye ntar a okata honho nyinara na wonye purda. Iyi ye Kuran no mu mbranssem na onnye ahyedze hun bi keke. Kuran aye no nhye a owo de yedzi do, naaso muhu de wonndzi do papa biara de mbre ose fata. Obinom a beye de banodzifo anaa Lajna mpanyinfo bi hye hon ma wokata hon tsir do no gyaa hon akatsirido no wo asordan no mu ma hon a woresiesie asordan no mu no sesawee.

Oye ampa de Islam aka de mbaa na mbanyin nyinara nhwe hon ho yie na Anohoba Mesia (ANN) no tsitsir ahye mbasiafo peperepe de wonye ahweyie wo iyi ho papaapa, osiande mbanyin hon adzehwe wo mbre otse. Na de mbranssem yi wo ho ma mbaa na mbanyin nyinara. Onnye kaw pii biara de yebedzi dem mbranssem yi do anaaso de ohia mbodzenbo kese bi de yedze bedzi do na osiande wiadze yi mu afefedze edzi binom hon tsir ntsi wobu hon enyi gu nsem yi do. Dem ntsi Nyankopon aka de, se hom bedzi M'ahyedze do na hom aye dza ofata a, hom benya nkunyimdzi. Na se hom enntum annye dza ose fata de hom ye a, ono hom nhu de Somafo no n'asodzi ara nye de obobo nsem no ho dawur akyere hom. Se hom bedzi mbranssem no do dza, wobekan hom aka hon a woenya kwankyerapa no ho na woka hon a wodzi hon Bai'at bohye no do. Se annye dem a, yehu no de Allah hu biribiara.

Mma yennya tsirmudew bi de yeaye Ahmadiyyafo ara kwa, anaa wawo hen ato Ahmadiyya Kuw yi mu fi dua mu ntsi. Anohoba Mesia (ANN) no ka de Bai'at gyan no nnkyere mfaso bi mma hom gyede hom dze ndwumapa dzi ekyir. Afei Salat ye Nyankopon N'ahyedze a woka de ono nye botae a wogyinaa do dze bo odasanyi, naaso iyi nyinara ekyir no hen banodzifo no bi ye ho akwadwer. Banodzifo no bi wo ho a se wopue a woye edwuma de mbre ofata na se wo ha nso a woye asor de mbre ofata na woye no wo nyamesuro mu. Mbom hon ayernom bo hon sombo de wonnye asor wo fie.

Se Nyankopon Ne mbranssem a no mu tsitsiriw nye iyi no se yenndzi do a, ono dza yeka de yebeye no nyinara ye kwa. Owo de henara yeeye hen mu nsakyer a owo de yeeye na wama yeetum edzi mbranssem nyinara do. Na hom mbo mbodzen de hom benya Nyankopon N'enyigye. Iyi pe na obi ye a, wobefre no de oye obi a odzi mbra a okyer de "yeatse na yedzi do" do, na woyinom ara so na wobeye momin (agyedzifo) na iyi ekyir no ancorankor abo mbodzen de obotu anamon ako enyim wo gyedzi ekyir na woetu mpon wo ne gyedzi mu na wama n'adwen ako papaye do. Dem nkorofu yi na wobonya Khilafat no n'adom ho mfaso. Yebotum so aka de, Nyankopon abo nkorofu a wotse dem yi anohoba na woyinom ara so na wobonya Khilafat noho adom ho mfaso, woenya bambo nye asomdwee. Na hon suro bedan aye bambo na wobonya gyedzi na woye atseneneefo, na wahye nyamesom ahyedze ma na woremma biribiara mbata Nyankopon ho nsom no. Na wobeye ndaasefo ama Nyankopon N'adom mbordo mbordo no onam Khilafat do dze adom hon no.

De mbre m'edzi kan aka no, Nyankopon aye Khilafat nhyehyee no wo Ahmadiyya Kuw yi mu na onkotum esi wo beebiara bio. Ahmadiyyafo tsir aye yie, asiande woagy Anehoba mesia (ANN) no edzi na woenya Khilafat adom. Dem ntsi hom nkaa no aber biara de bohye no wo gyinabew bi a obata ho a wo de yedzi do ansaana dem adom yi aka hen nsa. Okyerere de yedzi nhyehyee no do a nna yebenya bambu wo Nyame N'adom ntsi. Na hen suro adan aye asomdwee na iyi ye adze a hen Kuwmba pii enya ho suahun mpen pii. Mber yi mu no, hon a wonnye Ahmadiyya Muslim mpo edzi ho dase de mbre Nyankopon si dan Ahmadiyyafo hon suro gyinabew ye no asomdwee. M'aka iyi ho asem mpen pii a wabesen kor.

Gyinabew a nna Ahmadiyya wo mu ansaana woriyi Khalifa a oto do enum no, na dodowara, tsitsiriw Muslimfo a wonnye Ahmadiyya no rotweton de basabasaye bi besi Ahmadiyyafo hen mu. Naaso Nyankopon hyee N'anehoba a Ode bo Anehoba Mesia (ANN) no ma wo kwan nwanwaso do ma wiadze nyinara ho boow hon. Wo M.T.A efi do a Muslimfo a wonnye Ahmadiyyafo so hwe bi no, hunii kwan nwanwaso a Nyankopon faa do sesaa osuro gyinabew yee no asomdwee. Iyi yee hon nwanwa pii.

Muslimnyi bi a woagy dzin yie wo Pakistan a oye Ahmadiyyanyi bi ne nyenko kaa de, wo mu de menngye hom nndzi de hom ye nokwarfo naaso mobotum aka de Nyankopon No Tum na Ne Mboa wo hom do. Se mohwe mfonyi a okyerere kwan a hom fa do dze yii hom sunsum mu kandzinyi a oto do enum no a. Iyi ara ma yehu binom wo ho a woehu nsenkyeredze nyinara ekyir no woda ho ara gyina hon dadaw mu. Atsetsee a Ahmadiyyafo gu do roko mu wo Pakistan no kyere de worennya mpontu na kanku. Na wuhu de daa nyinara hen mu retserew na yeranya nkunyimdzi ber na ber nyinara na hon mbodzembu na hon aperdzi a woridzi de wobotum ertu Ahmadiyya ase koraa no nnye nkodo. Wo ko do ara hwehwe kwan a wobefa do dze asee hen.

Na m'aka de O! Ahmadiyya atanfo, hom nkaa de hen Ewuradze na hen nyanko nye Nyankopon No a Tum nyinara ye Ne dze no. Onnkema hom kwan ma hom edzi nkunyim da biara da. Siesiara dze Islam nkunyimdzi no bodua Anehoba Mesia (ANN) no do. Islam ne frankaa no oye Anehoba Mesia (ANN) no n'akowa na obotu. Dem frankaa yi, hon a wobepagya no sor nye hon a wo wo gyedzi a osi pi wo Khilafat nhyehyee no a otse de nkomye gyinabew no, hon a wodze honho abata Khilafat ho na wo ye de ahondze a woesina hon nye Ahmadiyya Kuwmba; hon na weso Allah N'ahoma no mu dzendzeendzen. Dem ntsi hom mbodzembu biara, hom ndzeyeebon nyinara, kaansa wiadze yi mu aban bi taa hom ekyir mpo a, hom nnkotum aka Khilafat-e-Ahmadiyya ahye, de yebenya hon botae a osi hen enyi do anaa de hom botum esiw Ahmadiyya mpontu ho kwan.

Owo de Ahmadiyyafo so hu de, adze a obema woenya nkodo nye de; wobeye atseneneefo na woaye asor na wabu sika afor, iyi na obema woenya Khilafat ho adom mbordo mbordo. Dem ntsi wo de Kuwba biara bo mbodzen de obeye n'asodzii a oda no do de mbre obeye ma woenya Nyankopon N'adom no bi. Afei, merebeka Anehoba Mesia (ANN) no ne akyerew no bi a okyerewe faa hon a wodze honho bata Khilafat ho no anaa

hon a wowa Jama'at yi mu na wonya Khilafat ho nhyira na adom na wonya Nyankopon N'enyigye.

Ahohoba Mesia (ANN) no ka de:

“Na hom so hom nya Sunsum Kronkron ne kyefa wo odo nye ahotsewee mu de hom betsew hom akra ho. Se ekwetsir Sunsum Kronkron no a, obi ronntum nya nyamesuro na woetum eyi honam akondo nyinara akwa. Hom mfa kwan a oko Nyankopon ho no do na oye kwan ketsekete bi. Mma hom nya do mma wiadze yi mu akondode, ono wobeyi hom efi Nyankopon n'akwan no do. Hom mfa ahobrase su wo Nyankopon ntsi. Yawdzi a Nyankopon enyi gye ho no dzi mu sen enyigye a ohye No ebufuw. Na nkogu a Nyankopon enyi gye ho no dzi mu sen nkunymdzi a otwetwe Allah N'ebufuwhyew. Odo a odoze wo ben Allah N'ebufuwhyew ho na yi no tokyen. Se rema w'akoma mu atsew na aba No ho a, Oboko wo mboa ma ehu kwan a owo de efa do na otanfo biara nnkotum edzi wo emin. Nnkenya Allah N'enyigye ara da gyede iyi w'apedze akwa, etow w'enyigyedze nyinara gu, edze w'enyimnyam bo afor, epow w'ahonya, iyi wo bra tokyen, idzi emia wo No kwan mu a obema aso owungyam ahwe.

Mbom, susuampaara de efonawo dem nkodzen yi ho no, ebetsena Nyankopon Ne sere do de abotoaba a enyi gye noho. Na wobeye hom adzedzifo wo anokwarfo a woetwa mu ko no do. Abow a oye nhyira no wobo buei ama hom. Mbom nyimpa kumaabi na woka woyinom ho. Nyankopon kasaa kyeree me kaa de: Taqwa (nyamesuro) ye dua a wodua no wo akoma mu. Nsu no a oma Taqwa nyin fefew no ono na ogu ture no mu nsu. Taqwa nye ntsin a se ennya a ntseasee nnyi biribiara mu, na se ogyina pintsinn a nnkeyew biribiara. Eben ndzenoa na owo ho ma obi a okhen ndzeyee hun mu dze n'ano famfa se de ohwehwe Nyankopon wo ber a onnyi egyina nan wo n'Ewuradze nkyen. Hwe, meka no nkowar na pi si mu de, nyia a ne gyedzi nye wiadze ndzeyee edzi afora kumaabi mpo no na oasee. Hell twe ben onyia no papaapa na adze a osusu ho nyinara nnye Nyankopon dze- mbom binom ye Nyankopon dze na nkaa no so ye wiadze dze. Dem ntsi se ewo wiadze ho ndzeyee fi wo wo susudze biara mu a, wo som nyinara ye egyangyandze”.

Afei Ahohoba Mesia (ANN) no de:

Mbom, ampaara se ewu owu a eku wo nyimpa dua efidze a, ono behen Nyankopon mu na Nyankopon nye wo betsenawo. Na wobehyira fie a etse mu no na Nyankopon N'ehumbobor bodwir abamba no a oye wo fie abamba no. Na kurowpon a dem nyinpa no tse mu no, wobehyira no. Se wo bra na wo wu, wo ndzeyee na anamontu, na w'ayemuyie, na w'ebufuw ye Nyankopon nkotsee dze, na se enya amandze anaa eko ahokyer mu na annse Nyankopon annhwe anaa annye no enntwa amodzin mu a-mbom ber a ewo dem nschwe yi mu etwe ben Nyankopon a, ono meka no nokwar mu kyere hom de, hom beye nkorofa a Nyankopon asemu eyi hom. Hom so woye nyimpa de mbre moso meye nyimpa na Nyankopon Noara a Oye medze no ye hom dze. Dem ntsi mma hom nsee hom ndzeyee pa.

Hwe, se hom to ko Nyankopon do pii a, ono hom mma menkaa hom-na medze Nyankopon Ne pe na N'enyigye ka de hom beye No nkorofa a wase mu eyi hom. Hom mma Nyankopon Ne Keseye nya ntsin wo hom akoma mu na hom ngye No Korye nto mu nnye de

hom dze hom ano famfa keke, mbom hom mfa ndzeyee ntaa ekyir ama Nyankopon so dze ndzeyee akyere N'ehumbobor na Ayemuyie wo hom do. Hom ntwe homho mmfi ndabraba ho na womfa nokwar ehumbobor nkyere nyimpa. Hom mfa kwan tsenenee biara do na woana nyim akwan yi no mu dza obeye hom?

Hom ndzi ehurisi na hom enyi ngye de agordzibea a wodze ben Nyankopon no ato pan. Oman biara kyere no do ma wiadze na dza Nyankopon enyi gye ho no wiadze mmfa n'adwen nko do. Mber aso a hon a wope de wodua abow yi mu no, de wodze hon ahodzen nyinara no, woyi hon tumye kyere na wonya adze no a enyi ber ho de biribi no fi Nyankopon ho. Mma nndwen de Nyankopon nkunyimdzi aye hom dze. Hom nye aba no a Nyankopon dze Ne Nsa edua no wo asaase yi do. Nyankopon kaa de dem aba yi benyin na oefi nhyiren abeye duapon. dem ntsi, nhyira nye nyia ogye dza Nyankopon aka no to mu na onnsuro nktorka.

Nyankopon kasaa kyeree me na Okaa de menka nkyere me Jama'at de hon a wogye dzi na hon gyedzi no, wiadze ho enyigye ndzii no afora no, na nkonkansa na akotooye nnyi mu no na kwan biara mu oye setsie no, dem nkorofu na Nyankopon N'enyi gye hon ho. Na Nyankopon ka de, nokwar woyinom na hon gyinabew ye Nokwar no.

Ketseankyee Nyankopon ama hen nyinara ahye Anohoba Mesia (ANN) ne pe na n'apedze nyinara a onyaa no ma, na Oama hen nyinara dze nokwar na setsie nkitahodzi a yenye Khilafat wo no etsim ho na Odze ahodzen a yebotum dze setsie a yeto no abaw a onnhyia edwir hen ma yedze etsim ho, na Oama yeenya dza okron papaapa wo asoye mu, ama yeako do ara de wodze Khilafat no akyedze kese behyira hen. Onnye ho.

Translated by: 1. Mr. Alhassan Kobina Atta-Wenchie
(Tutor in English Language, Jamiatul Mubashireen, Ghana)
2. Maulvi Alhassan Bashir Annan Sahib
(Tutor, Jamiatul Mubashireen, Ghana)
3. Mr. Rasheed Possible Essuman Sahib
(First Year Student, Jamiatul Mubashireen, Ghana)

Downloaded from: www.jamiatulmubashireen.org
Contact: www.jamiatulmubashireen.org/contact-us